




ՀԱՅՈՑ ՏՈՄԱՐԻ ՈՐՈՇ ՀԱՐՅԵՐԻ ՄԱՍԻՆ

ՀԱՅՈՑ ՕՐԱՑՈՅՑԻ ԲԱՐԵԿԱՐԳՈՒՄՆ ՈՒ ԿԱԹՈՂԻԿՈՍՆԵՐԻ ԳԱՀԱՑՈՒՑԱԿԸ

Հայկական օրացույցների մասին այսօր մեր ունեցած պատկերացումները բառական ծառայուն են եւ ամբողջական, այդուհանդերձ, դրանք տակաւին հեռու են սպառիչ լինելուց: Կան հարցեր, որ հայագիտութեան մէջ վաղուց ի վեր եղել են քննարկման ու վէճի առարկայ: Միեւնոյն ժամանակ, շարունակաբար ընթացող հետազօտութիւնները շրջանառութեան մէջ են դնում նորանոր տուեալներ եւ առաջ են քաշում նոր մօտեցումներ, որոնց հիման վրայ քննութեան ենթակայ են դառնում ցարդ անստարկելի համարուած պատկերացումներ: Այս առումով առաւել հարուստ եւ անակնկալներով յոյ է հնագոյն շրջանի հայկական օրացույցների ուսումնասիրութիւնը: Միեւնոյն ժամանակ, տակաւին լուծման կարօտ հարցեր կան՝ կապուած ժամանակով մեզ անհամեմատ մօտիկ՝ Հայոց Մեծ թուականի հետ:

Ընդհանրապէս, ամեն մի օրացույցի մասին պատկերացումը. կարելի է ամբողջական համարել, եթէ յայտնի են, թէ.

- ա) երբուանից է սկսում հաշուարկը,
- բ) որքան է օրացուցային տարուայ տեւողութիւնը (նշգրիտ եւ միջին արժեքները),
- գ) ինչ կազմութիւն ունի տարին (ամիսներ, դրանց օրերի քանակը),
- դ) ինչ կերպ են այդ օրացույցով որոշուել տօների օրերը,
- ե) երբ եւ ում կողմից է հիմնադրուել,
- զ) ինչ աղերսներ ունի իրենից առաջուայ այլ օրացույցների հետ (փոխառութիւններ են),

է) հիմնուելուց յետոյ երբ եւ ինչ փոփոխութիւնների է ենթարկուել:

Անշուշտ, կան այլ կարեւոր հարցեր եւս, ինչպէս, օրինակ՝ ամսանունների ծագումը, իմաստը, օրացուցային այլ եզրերի ծագումը եւ այլն, սակայն դրանք օրացույցից ստելի վերաբերում են այլ բնագաւառների եւ բուն՝

օրացույցին վերաբերող հարցերը կարելի է սահմանափակել թուարկեալ կետերով:

Հայոց Մեծ Թուականի պարագայում այս ցանկի առաջին չորս կետերը բազմակողմանիօրէն քննարկուած եւ հիմնականում պարզուած են, սակայն հինգ, վեց եւ եօթներորդ կետերում այս օրացույցը տակաւին կարօտ է լուրջ քննութեան:

Արդ փորձենք պատասխանել դրանցից առաջինին:

Ե՞րբ եւ ո՞ւմ կողմից է հիմնադրուել Հայոց Մեծ Թուականը:

Այս հարցերը տոմարագիտական եւ պատմագրական առումով մեծ կարեւորութիւն են ունեցել իրենց ծագումից ի վեր: Ի հաստատումն այդ կարեւորութեան, մեզ են հասել դրանց վերաբերեալ բազմաթիւ վկայութիւններ հայ (եւ ոչ միայն հայ) մատենագրական սկզբնաղբիւրներում: Միեւնոյն ժամանակ, սրանց պատասխանները նոր շրջանի ուսումնասիրութիւններում եւ ակադեմիական հրատարակութիւններում միարժէք չեն եւ ոչ միշտ՝ համաձայն սկզբնաղբիւրների տեղեկութիւններին: Այս խնդիրը առաւել հանգամանալի հետազօտուած է Հ. Մ. Չամչեանցի¹, Մ. արք. Օրմանեանի², Էդ. Աղայեանի³, եւ այլոց կողմից:

Ահա նոր շրջանի ուսումնասիրութիւնների եւ որոշ հրատարակութիւնների տուեալները այս մասին:

Հ. Միքայէլ Չամչեանցը տոմարի կարգադրութիւնը դնում է 551 թ. Մովսէս Եղիվարդեցի կաթողիկոսի առաջին տարում (նշ. աշխ., էջ 256, 490—516):

Մաղաքիա արքեպիսկոպոս Օրմանեանը համարում է, որ ժամանակի կաթողիկոսն է եղել Ներսէս Բագրեւանդեցին (548—557 թթ.) եւ նրա օրօք էլ եղել է Հայոց տոմարի կարգադրութիւնը (նշ. աշխ., սիւն 553), իսկ տոմարի վերջնական նորոգութիւնը դնում է Մովսէս կաթողիկոսի 10-րդ տարում՝ 584-ին (անդ, սիւն 571):

Աստղագէտ-տոմարագէտ Հայկ Բադալեանը, հետեւելով Մ. Օրմանեանին, տոմարի հարցի քննութիւնը դնում է 555 թ.՝ Ներսէս Բագրեւանդեցու օրօք⁴, իսկ տոմարի բարեփոխութիւնը՝ 584-ին՝ Մովսէս կաթողիկոսի օրօք (անդ, էջ 65):

Էդուարդ Աղայեանը եւս, ըստ էութեան, այս հարցում հետեւում է Մ. Օրմանեանին: Նա էլ տոմարի կարգումը բաժանում է երկու փուլի. 551-ին՝ տոմարը կարգելու որոշումը (նշ. աշխ., էջ 176) Ներսէս կաթողիկոսի օրօք, իսկ 584 թ. հինգհարիւրակի ընդունումը (ենթադրում է՝ Մովսէսի օրօք) (անդ, էջ 168):

Այս նոյն կարծիքն է որդեգրուած եւ ՀՍՀ հանրագիտարանում (հատոր 8, էջ 252, 1982 թ.) եւ որոշ այլ պաշտօնական հրատարակութիւններում:

Վերոբերեալ տուեալներից երեւում է, որ ներկայումս այս հարցի վերաբերեալ կարծիքները միասնական չեն: Փաստօրէն այս մասին ունենք իրա-

¹ Հ. Միքայէլ Չամչեանց, Պատմութիւն Հայոց, հատոր Բ., Վենետիկ, 1785: (Պատճենատիպ հրատարակութիւնը՝ Երեւանի Համալսարանի հրատ., Երեւան, 1984):

² Մաղաքիա արքեպ. Օրմանեան, Ազգապատում, հատոր 1-ին, Կոստանդնուպօլիս, 1912:

³ Էդ. Բ. Աղայեան, Ակնարկներ Հայոց տոմարների պատմութեան, էջ 151—182, ՀՍՀ ԳԱ Հրատ., Երեւան, 1986:

⁴ Հ. Ս. Բադալեան, Օրացույցի պատմութիւն, ՀՍՀ ԳԱ Հրատ., Երեւան, 1970, էջ 63:

րից էապէս տարբեր երկու մօտեցում: Առաջինը Միքայէլ Չամչեանցիին է, երկրորդը՝ Մաղաքիա արքեպս. Օրմանեանինը: Մնացածները այս կամ այն կերպ յարում են սրանցից մէկն ու մէկին:

Առաջադրուած երկու հարցերը ուշագրաւ են նաեւ նրանով, որ երկուսի մասին էլ մեզ հասած մատենագրական սկզբնաղբիւրների տուեալները հակասական են, հէնց սա էլ հանգեցրել է այդ մասին արդի տեսակէտների տարամէտ լինելուն: Բոլոր սկզբնաղբիւրները համաձայն են միայն երկու կէտում. որ օրացոյցի պատուիրատուն եղել է Հայոց կաթողիկոսը, եւ հիմնադրումն էլ տեղի է ունեցել Զ դարում, 540 թուականից յետոյ: Սկզբնաղբիւրներում այս առթիւ յիշատակուած են Հայոց երեք կաթողիկոսներ. Ներսէս Բագրեւանդեցին, Յովհաննէս Գաբեղեանը եւ Մովսէս Եղիվարդեցին: Արդի ուսումնասիրողները յոլովում են միայն Մովսէս և Ներսէս կաթողիկոսների անունները (տե՛ս վերը): Պակաս խճճուած չէ նաեւ հիմնադրման թուականի հարցը: Սկզբնաղբիւրները տալիս են 541—562 թթ. միջակայքում տարբեր տարեթուեր, իսկ արդի թուականների միջակայքն է 551—584 թթ.: Նկատենք, որ այս հարցի միարժէք լուծմանը մեծապէս խանգարել է աղբիւրների տարաձայնութիւնից զատ, նաեւ Հայոց կաթողիկոսների եւ Ե—Է դարերի Հայաստանի մարզպանների անսխալ ժամանակագրութեան չգոյութիւնը: Հայոց կաթողիկոսների (մասամբ եւ մարզպանների) համար այսօր ընդունուած է Մ. Օրմանեանի կազմած ժամանակագրութիւնը⁵, որ իր բազում արժանիքներով հանդերձ, անթերի չէ եւ շատ կէտերում հակասում է սկզբնաղբիւրներին: Անշուշտ, այստեղ «մեղքը» ոչ թէ Օրմանեանինն է, այլ նրա կազմած ժամանակագրութիւնը որպէս անառարկելի ճշմարտութիւն որդեգրողներինը, առաւել եւս, որ Մաղաքիա արքեպիսկոպոսն իր գրքի սկզբում նշում է. «... մեր աշխատութեան մէջ պէտք չէ փնտռել ոչ քննադատական հետազօտութիւններ, ոչ գիտական ուսումնասիրութիւններ, եւ ոչ ալ կազմաւորեալ բանավէճեր...»⁶: Թէրեւս այստեղ դեր են խաղացել Օրմանեանի մեծ հեղինակութիւնն ու նրա գործի կոթողայնութիւնը:

Եթէ ստույգ յայտնի լինէր տոմարի հիմնադրման թուականը, եւ ունենայինք նաեւ կաթողիկոսների ու մարզպանների ճշգրիտ ժամանակագրութիւն, դրանով կ'իմացուէր նաեւ պատուիրատու կաթողիկոսի ինքնութիւնը: Եւ հակառակը՝ ստույգ իմանալով պատուիրատուին ու նրա ժամանակագրութիւնը, կարելի կը լինէր ճշգրտել հիմնադրման ժամանակը:

Սոյն պարագայում, առաջադրուած երկու հարցերը նշուած ձեւով լուծելի չեն: Այսինքն, այս հարցերը մէկը միւսով պարզել չենք կարող: Խնդիրը սկզբունքօրէն լուծելի դարձնելու համար հարկ է միասնաբար քննարկել տոմարի կարգադրութիւնից զատ, նաեւ ժամանակագրօրէն դրան աղերսուող այլ իրադարձութիւններ, որոնց մասին անելի շատ տեղեկոյթ կարելի է կորզել մատենագրական սկզբնաղբիւրներից: Այս ժամանակները, թէպէտ հարուստ են կարեւոր իրադարձութիւններով, սակայն աղքատ են ժամանակակից ու վաւերական յիշատակարաններով: Հայր Ալիշանի խոստովանութեամբ «... այս յիշեալ 70 տարուան միջոցս... (485—553) մեր պատմութեան մթագոյն ժամանակներէն մէկն է. այս միջոցիս եւ գրեթէ բոլոր Զ դարու մէջ ազ-

⁵ Այս ժամանակագրութիւնը տե՛ս Օրմանեանի «Ազգապատում»-ում: Նոյնը որդեգրուած է եւ ՀՍՀ հանրագիտարանում (հ. 5, 1979, էջ 166), Էջմիածնի օրացոյցում եւ այլուր:

⁶ Մ. Օրմանեան, նշ. աշխ., սիւն 9:

գային պատմիչ մը չունիմք կամ չեմք գտած, որ մեր աշխարհին մէջ հանդիպածները մանրամասն իմացնէ մեզի»⁷:

Մեր խնդրի լուծման համար կը փորձենք օգտագործել մատենագրական տեղեկութիւններ ժամանակով իրար մօտ եւ իրար հետ առնչուող հետեւեալ իրադարձութիւնների մասին.

- ա) Մովսէս Եղիվարդեցի կաթողիկոսի ընտրութիւնը,
- բ) Հայոց թուականի հիմնումը,
- գ) ԸԼԲ պարբերաշրջանի գիտը,
- դ) Յիգտրուզիտի նահատակութիւնը,
- ե) Հայոց կաթողիկոսութեան բաժանումը երկուսի,
- զ) Աբրահամ Աղբաթանեցի կաթողիկոսի ընտրութիւնը,
- է) Վարդան Մամիկոնեանի ապստամբութիւնն ու Սուրէն մարգարանի սպանութիւնը, նաեւ որոշ այլ իրադարձութիւններ:

Այս ցուցակում առաջինն ու երկրորդը հէնց մեր խնդրոյ առարկայ իրադարձութիւններն են: Միւսները այս կամ այն կերպ աղերսում են սրանց հետ: Այս ամենի մասին էլ տեղեկութիւն աղբիւրները մատենագրական են:

Ստորեւ փորձենք աղիւսակով ներկայացնել Հայոց թուականի հիմնման եւ ԸԼԲ պարբերաշրջանի (Ը-եակի) գիտի վերաբերեալ մատենագրական տարբեր աղբիւրներից մեզ հասած տուեալները (տե՛ս աղիւսակը): Այստեղ ներկայացուած են ոչ բոլոր աղբիւրները եւ ոչ բոլոր տեղեկութիւնը: Մնացածները կը քննենք ըստ կարգի: Աստ նկատենք նախ եւ առաջ, որ չնայած նոյն իրադարձութեան մասին այստեղ հաւաքուած տեղեկութիւնների ակնյայտ անհամաձայնութեանը, դրանց մէջ կայ նաեւ որոշակի օրինաչափութիւն. բոլոր աղբիւրներն էլ համաձայն են, որ նշուած ժամանակ Յունաց կայսր է եղել Յուստինիանոսը եւ Պարսից արքայ՝ Խոսրովը: Յուստինիանոս Ա կայսրը իշխել է 527—565 թթ. (38 տարի), իսկ Պարսից Խոսրով Ա Անուշիրրուան թագաւորը գահակալել է 531—579 թթ. (48 տարի): Այս երկու տիրակալների միաժամանակեայ գահակալումը եղել է **531—565 թթ.** (34 տարի): Այսինքն, Հայոց տոմարի կարգադրումը **բոլոր** հեղինակներն էլ դրնում են հէնց այս միջակայքում: Աւելին, Յուստինիանոսի գահատարիներով թուականը տուողները տալիս են նրա 14, 25 կամ 34-րդ տարիները. ոչ ոք չի տալիս 14-րդ տարուց վաղ ժամանակ, իսկ դա էլ մեր որոնած թուականի համար ստորին սահմանը հասցնում է 540 թ., որով մեր միջակայքը դառնում է **540—565 թթ.:**

Սակայն սա հարցի մի կողմն է միայն: Բերուած տուեալների աղիւսակը շատ անելին է ասում, քան միայն տարբեր ձեւերով թուերը նշելը: Երբ նայում ենք աջ կողմի երկու սիւնակներին, տեսնում ենք այստեղ ներկայացուած տուեալների շատ մեծ համասեռութիւն:

Այստեղ բոլորն էլ Հայոց թուականի դրուելը դնում են Քրիստոսի 553 թուականին: Միայն Յովհաննէս Կոզեռնն ու Միսիթար Այրիվանեցին են դրնում մէկ տարով պակաս՝ 552 թ.: Այստեղ Քրիստոսի թուականը տրուած է ըստ Քրիստոսի ծննդեան համար Հայ ժամանակագրութեան մէջ ընդունուած հաշուի, որ մեր արդի փրկչական թուականից մէկ կամ երկու տարով անելի է, այնպէս որ, այս բոլորն էլ տալիս են մեր ներկայ թուահաշուով փրկչական 551 կամ 552 թուականը: Նոյնն է տալիս եւ Ասողիկի տուած 304 Յու-

⁷ Հ. Ղ. Ալիշան, Յուշիկը Հայրենեաց Հայոց, հատոր ք., Ս. Ղազար, Վենետիկ, 1870, (էջ 313):

	Հեղինակը	Հայոց կաթողիկոս (տարին)		Յունաց կայսր (տարին)		Պարսից արքան (տարին)		Հայոց (Հ) կամ Քրիստոսի (Ք) բուականը	
		Հայոց բուականի դրուելը	Շ-եակի գիտը	Հայոց բուականի դրուելը	Շ-եակի գիտը	Հայոց բուականի դրուելը	Շ-եակի գիտը	Հայոց բուականի դրուելը	Շ-եակի գիտը
Ա	Անանիա Շիրակացի ⁸	—	—	Յուստիանոս (20)	Յուստիանոս (34)	Խոսրով	Խոսրով (24)	—	10 (Հ)
Բ	Յովհաննէս Կոզեռն ⁹	Յովհաննէս Գաբրէլեան (10)	—	Յուստիանոս (25)	—	Խոսրով (25)	—	552 (Ք) 5976 (Աշխարհ)	10 (Հ)
Գ	Յովհաննէս Սարկաւազ ¹⁰	Մովսէս (10)	—	Յուստիանոս (34)	Յուստիանոս (34)	Խոսրով (24)	—	553 (Ք) 5976 (Աշխարհ)	313 (Յունաց) 10 (Հ) 562 (Ք)
Դ	Սամուէլ Անեցի ¹¹	Մովսէս (3)	—	Յուստիանոս	—	Խոսրով	—	553 (Ք)	10 (Հ) 562 (Ք)
Ե	Մխիթար Այրիվանեցի ¹²	Մովսէս	Մովսէս	—	—	—	—	552 (Ք)	10 (Հ)
Զ	Յովհաննէս Դրասխանա-կերացի ¹³	Մովսէս (10)	—	—	—	Խոսրով (31)	—	—	—
Է	Ուխտանէս ¹⁴	Մովսէս (10)	—	—	—	—	—	—	—
Ը	Ասողիկ ¹⁵	Ներսէս (4)	—	Յուստիանոս (14)	—	Խոսրով (24)	—	553 (Ք) (304 Յունաց բուական)	—
Թ	Մխիթար Անեցի ¹⁶	Մովսէս (4)	Մովսէս	—	—	—	—	553 (Ք)	9 (Հ)
Ժ	Կիրակոս Գանձակեցի ¹⁷	Մովսէս (3)	—	—	Յուստիանոս	—	—	553 (Ք)	10 (Հ)
ԺԱ	Վարդան Արեւելցի ¹⁸	Մովսէս (10)	—	Յուստիանոս (14)	—	Խոսրով (31)	—	—	—
ԺԲ	Յովհաննէս Մամիկոնեան ¹⁹	Մովսէս	—	—	—	—	—	—	—
ԺԳ	Գաւազանա-գիրք Հայոց կաթողիկոս-ներ ²⁰	Մովսէս (10, կամ 14)	—	—	—	—	—	—	—
ԺԴ	Գիրք թղթ-թղթ ²¹	Ներսէս (4)	—	Յուստիանոս (14)	—	Խոսրով (24)	—	0 կամ 1 (Հ)	—

⁸ Անանիա Շիրակացի, Տիեզերագիտութիւն եւ տոմար, Երեւան, 1940, էջ 86: Անանիա Շիրակացու Մատենագրութիւնը, Երեւան, 1943, էջ 396:

⁹ Տե՛ս Միքայէլ Չամչեանց, նշ. աշխ., էջ 509:

¹⁰ Յովհաննէս Իմաստասէրի Մատենագրութիւնը, 1956, էջ 132, 237, 210, 217:

¹¹ Սամուէլի Քահանայի Անեցոյ Հաւաքմունք ի գրոց Պատմագրաց, Վաղարշապատ, 1893, էջ 74—75:

¹² Մխիթարայ Այրիվանեցոյ, Պատմութիւն Հայոց, Մոսկվա, 1860, էջ 16, 48, նոյնը եւ՝ Սանկտ Պետերբուրգ 1867, էջ 20, 63, 64:

¹³ Յովհաննէս Կաթողիկոսի Դրասխանակերտցոյ Պատմութիւն Հայոց, Թիֆլիս, 1912, էջ 65:

¹⁴ Ուխտանէս եպիսկոպոս, Պատմութիւն Հայոց, Վաղարշապատ, 1871, էջ 6:

¹⁵ Ստեփանոսի Տարօնեցոյ Ասողկան Պատմութիւն Տիեզերական, Ս. Պետերբուրգ, 1885, էջ 82, 83:

¹⁶ Մխիթար Անեցի, Մատենան Աշխարհավէպ Հանդիսարանաց, ՀՍՍՀ ԳԱ հրատ., Երեւան, 1983, էջ 68:

¹⁷ Կիրակոս Գանձակեցի, Պատմութիւն Հայոց, ՀՍՍՌ ԳԱ հրատ., Երեւան, 1961, էջ 41—43:

¹⁸ Վարդանայ Վարդապետի Հաւաքումն Պատմութեան, Վեներտիկ, 1862, էջ 57—58:

¹⁹ Յովհաննէս Մամիկոնեանի եպիսկոպոսի Պատմութիւն Տարօնոյ, Վեներտիկ, 1889, էջ 8:

²⁰ Տե՛ս Սամուէլ Անեցի ... գրքի ծանօթագրութիւնների մէջ, էջ 271, 274, 275:

²¹ Գիրք թղթոց, Թիֆլիս, 1901, էջ 221:

նաց թուականը (որ անում է փրկչ. 551 թ.): Իրար շատ լաւ համաձայնում են նաեւ Ծ-եակի գիտի համար տարբեր հեղինակների տուած թուականները. բոլորը տալիս են Հայոց 10 կամ փրկչական 562 թուականը (միայն Մխիթար Անեցու մօտ ունենք Հայոց 9 թ., որ ինչպէս յետոյ կը տեսնենք, պարզ շփոթութիւն է): Ինչի՞ մասին է վկայում նոյն դէպքի վերաբերեալ տուեալների այս բարձր համասեւորութիւնը մի կողմից եւ մեծ անհամաձայնութիւնները՝ միւս կողմից: Սա նշանակում է, որ բոլոր հեղինակներն էլ լրատակ իմացել են, թէ երբ են տեղի ունեցել իրենց յիշատակած անցքերը (տոմարի կարգադրութիւնն ու ԵԼԲ բոլորակի գիտը), եւ դրանց թուականը (փրկչական, կամ Հայոց, կամ մի այլ թուահաշուով) տալուց բոլորն էլ տուել են նոյնը: Իսկ Հայոց կաթողիկոսի կամ Յունաց կայսեր ու Պարսից արքայի տարիներով տարբեր թուեր տալը վկայում է, որ ժամանակագրութիւն կազմելուց տարբեր հեղինակներ ձեռքի տակ ունեցել են Հայոց կաթողիկոսների, Յունաց կայսրերի եւ Պարսից արքաների ժամանակագրութեան տարբեր կանոններ (ցուցակներ): Իրաքանչիւր հեղինակ, իմանալով իրադարձութեան ստոյգ ժամանակը փրկչական (կամ այլ) տարեթուերով, իր ձեռքի տակ եղած կանոնով նայել է, թէ ով է եղել այդ թուին Հայոց կաթողիկոսը, Յունաց կայսրը կամ Պարսից արքան, եւ ըստ այդմ էլ դրել է, թէ որ կայսեր որերորդ տարին է դա, եւ համապատասխան Հայոց կաթողիկոսին էլ վերագրել է տոմարի կարգադրութիւնը: Այս կերպ, ահա առաջանում է աւսօր մեզ յայտնի պատկերը, երբ միեւնոյն գործը վերագրուած է Հայոց երեք տարբեր կաթողիկոսների:

Նախքան այս վերջին տարբերութեան քննութեանն անցնելը, դիտենք, որ տոմարին անդրադարձած **բոլոր** հեղինակներն էլ ըստ տեղի նշել են, որ Հայոց թուականը դրուել է Ծ-եակի գիտից (ի՞նչ տարի) առաջ: Եւ սա բնական էլ է, զի գալիս է **տոմարական հաշուումների բնոյթից**: Այդ հարցին անդրադարձած բոլոր հեղինակներն էլ նշում են, որ Անդրէասի 200-եակի աւարտից յետոյ ի՞նչ տարի խառնաշփոթութիւն է եղել (Յովհ. Սարկաւազ, Յովհ. Կոզեռն, եւն): Այս խառնաշփոթը գալիս էր նրանից, որ Անդրէասի 200-եակը պարունակում էր 10 19-երեակ եւ 10 յաւելեալ տարի եւս: Եւ քանի որ հաշուումներն արւում էին 19-երեակներով, ապա 200-եակի աւարտից յետոյ 9 տարի եւս պէտք էր՝ նորից 19-երեակի սկզբին դառնալու համար: Քանի որ Անդրէասի 200-եակի սկիզբն ու վերջը յայտնի են, ապա ինքնաբերաբար որոշում է նաեւ այս 9-ամեայ տոմարական շփոթի ժամանակը: Անդրէասի աղիսակի վերջին Չատիկը եղել է 552 թուականի Չատիկը (մարտի 31-ին): Դրա յաջորդ՝ 553 տարուայ Չատիկը որոշելու համար միասնական կերպ արդէն գոյութիւն չունէր եւ ամեն ազգ ինքնուրոյն էր այդ հարցը լուծելու: Ահա, Հայերն էլ, այդ հարցի ինքնուրոյն լուծումը յանգեցնում են ինքնուրոյն թուահաշուի ստեղծմանը: Փաստօրէն, Հայերը չեն սպասում հարցի համընդհանուր միասնական լուծմանը, եւ փոխանակ այդ իննամեայ միջոցը **ժամանակաւոր լուծումներով** անց կացնելու եւ միասնական լուծմանն սպասելու (թերեւս՝ օգտուելով առիթից, քաղաքական նկատառումներով), նրանք հարցը լուծում են **արմատապէս**՝ կարգում են սեփական ինքնուրոյն թուահաշիւ (բնականաբար եւ՝ զատկացուցակ): Այդ է պատճառը, որ Հայոց Մեծ Թուականի հաշիւը սկսում է Անդրէասի աղիսակի (200-եակի) աւարտից **անմիջապէս** յետոյ եւ Հայոց Թուականի առաջին Չատիկն էլ 553 թ. Չատիկն է (ապրիլի 20-ին): Իսկ հարցի համընդհանուր կարգադրութիւնը լինում է ի՞նչ տարի անց՝ 561-ին: Այդ տարի աւարտում

Էր Անդրեասի 200-եակի վերջին տասնիներակը (որ կիսատ էր թողնուած), եւ կարելի էր յաջորդ տարուանից Էլի այն կիրառել սկզբից: Սակայն Ադէքսանդրիայում 36 տոմարագէտների ժողովը վճռեց ոչ թէ վերստին կիրառել Անդրեասի 200-եակը, այլ անցնել ատելի կատարեալ համակարգի, որ էր Էսա Ադէքսանդրացու գտած 532-ամեայ պարբերաշրջանը (Ծ-եակը):

Այս հարցերով զբաղուող շատ մասնագէտներ զանց են ատել այս իրողութիւնը, եւ Հայոց տոմարի կարգադրութիւնը կաթողիկոսների տարիներին համաձայնեցնելու համար տոմարի կարգադրումը տեղափոխել են մինչեւ 584 թ.²²: Նկատենք սակայն, որ սեփական թուահաշիւ եւ տօնացոյց հիմնելու համար **յարմարագոյն ժամանակը 552—561 թթ. միջոցն էր**, երբ ասարտուած էր բոլորի կողմից ընդունուած Անդրեասեան 200-եակը եւ նոր որոշում էլ դեռ չկար: Այս ընթացքում Հայ եկեղեցու տոմարադիր ձեռնարկումը ատելի քան **օրինական էր եւ անառարկելի**: Եւ պատահական էլ չէ, որ այդ հարցին անդրադարձած միջնադարեան բոլոր հայ հեղինակները նշում են այս իննամեայ խառնաշփոթի մասին: Աւելին, կարելի է մտածել, որ հայերի վարքը արեւմուտքում շատերի սրտով չի եղել: Ըստ երեւոյթին հէնց սրան է վերաբերում այն, որ հայերի՝ առանձին կերպով նահանջ կարգելու (իմա՝ տոմարը կարգադրելու) մասին Անանիա Շիրակունին վկայում է. «... եւ հայք առանձին նահանջ կարգեցին: Զոր ոչ գովեցին ներհունք արուեստին, այլ սահմանեցին նոքա տոմար մերոյ ազգիս անշարժ որպէս այլոց ազգաց»²³: Ըստ այս վկայութեան, նոյնիսկ հայերի համար առանձին անշարժ տոմար են հիմնում (ամենայն հաւանականութեամբ՝ յոյները) որ բնականաբար, ընդունելութիւն չի գտնում (այդ մասին այլուստ ոչինչ յայտնի չէ): 500-եակի գիտից եւ ընդունելութիւնից յետոյ Հայերը միանում են դրա դրոյթներին, բայց եւ պահպանում են սեփական թուահաշիւն ու ամսակարգը:

Աստ նկատենք, որ Զ դարի կէտերը, երբ տեղի էին ունենում այս անցքերը, մեր եկեղեցու պատմութեան մէջ յայտնի է դաւանաբանական բուն վէճերով միաբնակութեան եւ երկաբնակութեան հարցի շուրջ: Այս շրջանում է, որ Հայ եկեղեցին վերջնականապէս զատորոշուեց քաղկեդոնականութիւնից եւ այս նոյն շրջանում էլ եղաւ (քիչ անց) Վրաց բաժանումը Հայերից: Այնպէս որ, ինքնուրոյն տոմար ունենալը այս անցուդարձի մէջ **առնուազն կարեւոր** պիտի լինէր: Եւ դրա համար էլ, ինչպէս նշուեց, **յարմարագոյն ժամանակը 200-եակի ասարտն էր**:

Ուրեմն, հարկ է Հայոց տոմարի կարգադրութեան ժամանակը չտեղափոխել, այլ պահել այն թուականի վրայ, որ **միաձայն** տալիս են դրան անդրադարձած **բոլոր** հեղինակները: Եւ այս առթիւ Մ. Օրմանեանի առարկութիւնը, թէ արտաքին եւ ներքին պայմանները աննպաստ էին տոմարի նորոգութեան համար մինչեւ 584 թ., տեղին չէ, որովհետեւ **տոմարը անհրաժեշտութիւն էր** (եւ է), **ինքնուրոյն տոմարը՝ շատ կարեւոր** (նկատի առնելով դաւանաբանական անյաշտ պայքարը) եւ **ժամանակն էլ՝ յոյժ նպաստաւոր** (կարելի է ասել՝ **միակ** յարմար ժամանակը):

Արդ, այսքանով կարող ենք Հայոց տոմարի կարգադրման ժամանակի հարցը լուծումը սեպել: Դա եղել է Անդրեասի 200-եակի ասարտին (կամ անմիջապէս յետոյ), 500-եակի գիտից ինը տարի սուսջ: Ինչպէս վերը նշուեց, Անդրեասի ցուցակի վերջին Զատիկը 552 թուականինն է: Ուրեմն, տո-

²² Տե՛ս, օր., Մ. Օրմանեան, նշ. աշխ., սիւն 571:

²³ Անանիա Շիրակացի, Տիեզերագիտ. եւ տոմար, էջ 89:

մարի կարգադրությունն էլ եղած պիտի լինի կամ հենց 552-ին (որ որոշեին յաջորդ տարուայ Զատիկը եւ հետագան), կամ էլ 551-ին, (որ որոշեին, թէ 200-եակի աւարտից յետոյ ինչ են անելու): Հայ մատենագիրներն այս առթիւ տալիս են Քրիստոսի ծննդեան 553 թուականը (միայն Յովհ. Կոզեռնն ու Միս. Այրիվանեցին են, որ տալիս են 552): Կան նաեւ 554 թ. տուողներ, (օր.՝ Անանուն Սեբաստացի՝ ԺԳ դար), բայց դա էլ դիւրաւ բացատրելի է Գ. եւ Դ տառերի նմանութեամբ-շփոթմամբ: Տրուած են եւ Աշխարհի արարչութեան (Դրախտից Ադամի արտաքսման) 5976 թուականը (Կոզեռն, Սարկաւազ, Յակ. Ղրիմեցի), ինչպէս եւ Յունաց 304 (ըստ Ասողիկի) եւ Ասորւոց 871 (ըստ Միխայիլ Ասորու) թուականները, եւն:

Յունաց 304 թուականը Հռոմի հիմնադրման թիւն է՝ հաշուած երկրորդ հազարամեակից, որ 247 փրկչական տարին է, դրանից հաշուած 304 թիւը կ'անի փրկչական 551 թուականը:

Միխայիլ Ասորու տուած 871 թուականը ամենայն հաւանականութեամբ շփոթումը է, կամ վրիպակ, զի Ասորւոց թիւ կոչուածը Սելեւկեան թուահաշիւն է, որ սկսում է Ն. Ք. 312 թուականից եւ ըստ այդմ դա կը տայ փրկչական 560 թիւը: Սրա վրիպակ լինելը երեւում է նրանից, որ այլ տեղում նոյն հեղինակը Հայոց Կ (60) թիւը գուգում է Ասորւոց ԶԼԳ (933) թուին եւ Հերակլ կայսեր 12-րդ տարուն, որով ըստ նրա Հայոց թուականը պիտի սկսուած լինի փրկչական 562 թուից²⁴: Ի դէպ, Հայոց թուականի այսպիսի հաշուումը օտար հեղինակի կողմից հաստատում է Անանիա Շիրակունու վերոբերեալ ասածը, որ օտարները Հայոց համար տոմար են կազմել եւ լրացնում է այն, ցոյց տալով որ այդ տոմարը սկսուել է փրկչ. 562-ից՝ Ծ-եակի գիտից (գուցէն հիմնուել է 560-ին):

Գալով Աշխարհի արարչութեան, կամ, ասելի ստուգ՝ Ադամի դրախտից արտաքսման թուականին (5976), այստեղ գործ է ածուած Արարչութեան, այսպէս կոչուած՝ Ադէքսանդրեան թուականը, որի սկիզբը հաշււում է Ն. Ք. 5423 թ. կամ (Հայկական Քրիստոնէական՝ Ն. Ք. 5425 թ.)²⁵: Այնպէս, որ Յովհաննէս Սարկաւազի, Յովհ. Կոզեռնի եւ Յակոբ Ղրիմեցու տուած 5976 թուականը համապատասխանում է փրկչական 551 կամ 553 թուականին (կախուած կիրառումից):

Գալով Քրիստոսի ծննդեան 553 թ. տուած հեղինակներին, նկատենք, որ Հայ մատենագրութեան մէջ ընդունուած Քրիստոսի ծննդեան թուականը յաճախ երկու (երբեմն՝ մէկ) տարով ասելի է մեր ներկայ թուականից, որով այս 553 թ. եւս կը տայ փրկչական (մեր կիրառած) 551 թուականը:

Իսկ գալով Քրիստոսի 552 թ. տուող հեղինակներին (Կոզեռն, Մ. Այրիվանեցի), ապա սա եւս նոյն 551 փրկչական տարին է տալիս վերոնշեալ տարբերութեան պատճառով (այլ հարց է, թէ ինչու Քրիստոսի ծննդեան Հայոց եւ արդի ընդունուած թուերը իրարից տարբերում են երբեմն երկու եւ երբեմն՝ մէկ տարով, եւ երբեմն էլ համընկնում են իրար):

Այսպիսով, տեսնում ենք, որ Հայոց թուականի հիմնման ժամանակը բոլոր սկզբնաղբիւրներով էլ փրկչական 551 թուականն է: Իսկ 500-եակի (ԸԼԲ պարբերաշրջանի) գիտը կը լինի դրանից ինը տարի անց՝ 560-ին:

²⁴ Միխայիլի Ասորւոց Պատրիարքի ժամանակագրութիւն, Երուսաղէմ 1871, էջ 256, 294—295:

²⁵ Ա. Գ. Աբրահամեան, Հայ գրի եւ գրչութեան Պատմութիւն, Հայպետհրատ, Երեւան, 1959, էջ 253:

Իրօք, փրկչ. 560-թիւն է տալիս եւ Սարկաւագ վարդապետի ու Սամուէլ Անեցու տուած Քրիստոսի ծննդեան 562 թուականը (որը Քրիստոսի ծննդ. հայկական թիւն է՝ ընդունուածից երկու տարով աւելի), եւ էլ Սարկաւագ վարդապետի տուած 313 Յունաց թիւը, որը Հռոմի հիմնադրման 1000-րդ տարուանից է հաշուած եւ սկսուելով 247 թուից, կը տայ փրկչ. 560-ը:

Այսինքն, ըստ վերոքննեալ տուեալների, Հայոց թուականի հիմնումը եղել է 551 թ., իսկ 500-եակի կարգումը՝ դրանից 9 տարի անց՝ 560-ին: Փաստօրէն Հայերը թուականը կարգել են նախքան 200-եակի աւարտուելը (552 թուականի Զատիկը դեռ չեկած), նախօրօք որոշելու համար Անդրեասի աղիսակի աւարտից յետոյ իրենց անելիքը: Ըստ երեւոյթին այդ ժամանակ արդէն պարզ է եղել, որ միջոց չի ձեռնարկում 552-ից յետոյ միասնական տօնացոյց ունենալու համար: 500-եակի գիտի համար ստացուած 560 թուականն էլ նշանակում է, որ Էսան ու իր գործակիցները Աղէքսանդրիայում ժողով են գումարել նոր աղիսակի կիրառումը սկսելուց երկու կամ մէկ տարի առաջ: Ի դէպ, այս 560 թուականը լաւ յարմարում է Միխայէլ Ասորու տուած 871 (Ասորոց) թուին, եւ հնարատր է, որ այս դէպքում արագապէս ժողովի գումարման տարեթիւը շփոթած է թուահաշուի սկզբի հետ: Կամ էլ դա հէնց նրանց կողմից Հայոց համար անշարժ տոմար կարգելու տարին է, որի մասին նշում է Ծիրակացին: Ըստ իս, այս վերջինը աւելի հաւանական է:

Արդ, տեսնենք, թէ այս արդիւնքի հետ ինչպէս է յարմարում շատ հեղինակների տուած Հայոց 10 (կամ 9) թուականը, որպէս Ծ-եակի գիտի, հինման տարի: Այս մասին բոլոր հեղինակները տալիս են Հայոց 10 թիւը, միայն Միսիրթար Անեցին և Ստեփաննոս Օրբէլեանն են տալիս 9 թուական (վերջինս տալիս է նաեւ՝ 10)²⁶:

Ինչպէս արդէն ասուեց, Անդրեասի 200-եակի աւարտից յետոյ տակաւին ինը լրում կար, տասնիններեակի աւարտին, որ պիտի լրնէր 561-ին: 561-ը 19-երեակի վերջին տարին էր, որից յետոյ էլի կարելի էր դառնալ 19-երեակի սկզբին, նաեւ՝ 200-եակի սկզբին: Վերջին տարուայ լրումը (խօսքը 19-երեակի մասին է) ապրիլի 15-ին էր, իսկ սկզբինը՝ ապրիլի 4-ին, իսկ 200-եակի վերջին լրումը մարտի 25-ին էր, եւ եւս 9 լրում էր պէտք, որ վերադառնային սկզբին՝ ապրիլի 4-ին: Իրօք, մարտի 25-ից յետոյ 9-րդ լրումը ապրիլի 15-ն է, որից յետոյ էլ՝ ապրիլի 4-ը: Արդ, նոր պարբերաշրջանը պիտի սկսուէր էլի ապրիլի 4 լրումով՝ 19-երեակի սկզբով: Եւ ապրիլի 4 լրումն էլ համապատասխանում էր 562 թուին: Հէնց ապրիլի 4 լրումն էլ դրուել է նոր պարբերաշրջանի գլուխը: Իսկ Հայոց թուահաշուի առաջին լրումը եղել է ապրիլի 13-ը²⁷: Արդ, եթէ նայենք Ծիրակացու (նաեւ՝ Սարկաւագի) ԾԼԲ բոլորակը, կը տեսնենք, որ առաջին տարուայ լրումը իրօք ապր. 13-ն է, իսկ ապրիլի 4 լրումը համապատասխանում է Ժ (10-րդ) տարուան: Այսինքն, այն տարին, որը դրուել է Ծ-եակի գլուխ, համապատասխանում է Հայոց 10 թուականին: Եւ ըստ այդմ, իրօք, 500-եակը սկսուել է Հայոց 10 թուականից: Իսկ գալով երկու տեղ այս առթիւ նշուած 9 թուականին, սա կարող է լինել հետեւանք կամ շփոթութեան (շփոթուել են արանքի 9 լրումները՝ 9 տարին եւ թուականը), եւ կամ էլ այստեղ նշուած է ոչ թէ 500-եակի սկիզբը,

²⁶ Ստեփաննոս Օրբէլեան, Պատմութիւն նահանգին Սիսական Թլ. Գլխ., 1910, էջ 96, 97, 501:

²⁷ Այս մանրամասների մասին տես օր. Յովհ. Սարկաւագի «Յաղագս ըստ Հռոմոց ամսոց...» աշխատութիւնը (Յովհ. Իմաստասէրի մատենագրութիւնը, էջ 247):

այլ 500-եակի կարգման՝ Աղէքսանդրիայի ժողովի տարին, որ ինչպէս տեսանք, 560 թ. է (եւ էթէ Հայոց թուականի տարին հաշուենք ոչ թէ Յունուարի 1-ից, այլ Նաւասարդի մէկից, որ ամառն էր այդ ժամանակ, ապա հաշուի մէջ կը մտնի նաեւ 552 տարին, եւ 560-ը կը լինի իններորդը):

Այսպիսով, տեսնում ենք, որ Հայոց թուականի հիմնման, Հայոց տարեհաշուի սկզբնաւորման, 500-եակի գիտի (Աղէքսանդրիայի ժողովի) եւ նոր պարբերաշրջանի սկզբի մասին մեզ հասած բոլոր տուեալները բացառիկ համասեւ են: Այս խնդրում ոչ մի շփոթ չկայ:

Արդ գանք ժամանակակից Հայոց կաթողիկոսի խնդրին: Սկզբնաղբիւրների գերակշիռ մասը նշում են Մովսէս Եղիվարդեցուն (նրա 10-րդ տարին): Սակայն Օրմանեանը Մովսէսի աթոռակալութիւնը դրել է 574—604 թթ., որ ոչ մի կերպ չի յարմարում օրացոյցի կարգադրմանը: Այդ պատճառով էլ տոմարի կարգադրումը բաժին է ընկել Ներսէս կաթողիկոսին:

Նկատենք, որ այս ժամանակահատուածի ժամանակագրութիւնը բաւական շփոթ է համարեալ բոլոր մատենագիրների մօտ էլ: Հէնց նրանց բերած տուեալներն արդէն խեղուած են ներքին հակասութիւններով: Այս հակասութիւնների մի մասը գալիս է գրչական աղաւաղումներից եւ յետսամուտ հատումներից, իսկ մի մասն էլ՝ գալիս է հեղինակների օգտագործած տարբեր՝ իրար հետ չհամաձայնող ժամանակագրական կանոններից:

Օրինակ, Անանիա Շիրակունու տուեալները, ամենայն հաւանականութեամբ, մեզ են հասել խեղաթիւրուած: Այսպէս, իր պատմութեան մէջ ճիշդ տալով (Յուստինիանոս Ա-ի եւ Խոսրով Ա-ի գահաւտարիները, մեկնոյն ժամանակ նա ՇԼԲ պարբերաշրջանի գիտը դնում է Յուստինիանոսի 34-րդ տարում եւ (դրա հետ մէկտեղ) տալիս է Հայոց թուականի կարգման համար նոյն կայսեր 20-րդ տարին²⁸: Միեւնոյն ժամանակ, նոյն հեղինակն այլուր նշում է, որ Ը-եակի դրուելուց Հայոց թուականը 10 էր, այսինքն, դրանց թուերի տարբերութիւնը պիտի լինի 9²⁹: Պարզ է, որ այստեղ աղաւաղում կայ: Եւ ամենահաւանականն այն է, որ Յուստինիանոսի 20-րդը պիտի եղած լինի 25-րդ (ԻԵ. երորդ→Ի. երորդ=քսաններորդ), որով այդ տարիների տարբերութիւնը իրօք կը դառնայ 9:

Այս կարգի սխալները համեմատաբար դիւրաւ շտկելի են նոյն հեղինակի տարբեր տուեալների համադրմամբ: Աւելի ծանր է միւս կարգի սխալների շտկումը, որ գալիս են նոյն հեղինակի օգտագործած տարբեր տուեալների անհամատեղելիութիւնից: Օրինակ, Յովհաննէս կաթողիկոս Դրասխանակերտցին Մովսէս կաթողիկոսի 10-րդ տարին զուգակշիռ է դնում Խոսրով Անուշիրուանի 31-րդ տարուն եւ այդ ժամանակ էլ դնում՝ տոմարի կարգաւորումը (աւելի ճիշդ՝ Ը-եակի գիտը)³⁰: Մի էջ անց, Մովսէսի օրօք («մինչդեռ կենդանի էր սուրբ հայրապետն Մովսէս») դնում է նոյն Խոսրով արքայի հաւատալը՝ մահանալուց մի քանի օր ստաջ (էջ 66), իսկ մի փոքր յետոյ էլ՝ նշում է, որ Սմբատ Բագրատունին Խոսրով Բ Փարոիզից կարգւում է Վրկանայ մարզպան եւ Աթլ երէցին ուղարկում է Մովսէսի մօտ, որ նրան եպիսկոպոս է ձեռնադրում (էջ 70):

Արդ, այս տուեալներով ստացում է, որ Մովսէսի առաջին տարին= Խոսրով Ա-ի 22-րդին, որ է 552 թ.: Ուրեմն, Մովսէսն աթոռակալել է 552-ից:

²⁸ Անանիա Շիրակացու մատենագրութիւնը, էջ 375, 396:

²⁹ Ան. Շիրակացի, Տիեզերագիտ. եւ Տոմար, էջ 86—89:

³⁰ Յովհ. Դրասխանակերտցի, էջ 65:

Խոսքով Ա-ի մահը եղել է 579-ին (այս ժամանակ դեռ ողջ է եղել Մովսեսը): Իսկ Աբելի ձեռնադրումը, որ եղել է Սմբատի Վրկանայ մարզպան եղած միջոցին (թեկուզ նրա մարզպանության հենց սկզբում), պետք է եղած լինի 599 թուից ոչ շուտ, զի յայտնի է, որ Սմբատը մարզպան է եղել 8 տարի եւ իր մարզպանությունն ամարտուել է Խոսքով Բ-ի 18-րդ տարում³¹, որ 607 թիւն է, դրանից 8 տարի առաջ կը լինի 599-ը: Ուրեմն 599-ին տակաւին ողջ եղած պիտի լինէր (ըստ այս տուեալի) Մովսեսը, որ Աբելին ձեռնադրէր: Այնինչ նոյն հեղինակը Մովսեսի կաթողիկոսությունը դնում է միայն 30 տարի (էջ 66): Այսինքն, մի կողմից ունենք 30 տարի, միւս կողմից՝ **առնուազն 47** տարի (599—552=47): Բացի այս, Յովհ. կաթողիկոսի վկայությունը, թէ Խոսքովի հաւատալն ու մահը) տեղի են ունեցել «մինչդեռ կենդանի էր» Մոսէսը, յուշում է, թէ այստեղ նկատի է առնուել Մովսեսի կյանքի վերջին մօտիկ ժամանակը, այլապէս այդ նշումը անելորդ է: Այստեղ տուեալների ներքին համաձայնություն կը կայանայ, եթէ սխալ սեպեմք Աբելի ձեռնադրումը Մովսեսից: Իրօք, այդ մասին վկայող շատ (եւ հնագոյն) աղբիւրներ չեն նշում Աբելին ձեռնադրող կաթողիկոսի անունը, այլ յիշատակում են միայն, որ այդ արել է Հայոց կաթողիկոսը³²: Այնպէս որ, Մովսեսից Աբելի ձեռնադրման հատուածը Յովհ. կաթողիկոսի պատմության մէջ կամ յետսամուտ է, կամ էլ արդիւնք՝ հեղինակի ձեռքին եղած մի սխալ սկզբնաղբիւրի: Պիտի մտածել, որ Աբելի ձեռնադրման պատմությունը նախապէս եղել է առանց կաթողիկոսի (Մոսէսի) կողմից ձեռնադրուելու մանրամասի (այդպէս է Սեբեոսի, Ասողիկի եւ այլ պատմություններում): Հետագայում այդ իրադարձությանը անելի մեծ կշիռ տալու միտումով, յատկել են կաթողիկոսից ձեռնադրուած լինելը, իսկ ապա՝ նայելով, թէ ով է եղել ժամանակի կաթողիկոսը, նրան էլ հենց վերագրուել է այդ ձեռնադրումը: Դատելով այս կարգի աղաւաղումների մեծ քանակից, այս ժամանակահատուածի Հայոց կաթողիկոսների ժամանակագրությունը արդէն Ժ—ԺԱ դարերից գոյություն է ունեցել մէկից անելի տարբերակներով (երկու, երեք, կամ գուցէ՝ անելի): Ո՞րն է սրա պատճառը: Թրւում է, շատ պարզ բան է այդ ժամանակագրությունը եւ սխալուելու տեղ էլ չկայ: Պէտք էր իմանալ միայն կաթողիկոսների հերթականությունը եւ նրանց տարիները: Անշուշտ, այս դէպքում սխալուելու տեղ չէր լինի: Ուրեմն սխալը ծնւել է այլուր: Ինչպէս նշեցինք սկզբում, խնդրոյ առարկայ ժամանակաշրջանը հարուստ է պատմական բոլոր վայրուվերումներով: Յայտնի է, որ այս ժամանակ Հայաստանը բաժանուած էր Պարսից եւ Յունաց տէրութիւնների միջեւ: Այս երկու գերտէրութիւնների անշաշտ պայքարը անբաժնութիւններ էր գործում ոչ միայն Հայոց երկրում, այլ եւ Հայոց հոգեւոր կեանքում: Այս պայքարի դրսևելորդումներից էր եւ այն, որ սոյն ժամանակ երկուսի բաժանուեց նաեւ Հայոց եկեղեցին: Յունական մասում, կայսեր կարգադրութեամբ, կաթողիկոս է դրւում Յովհան Բագարանցին, որ նստում է Կոտայքի Աւան գիղում, որ եւս կառուցում է Աւանի հռչակաւոր կաթողիկէն: Այս կաթողիկոսի տարիները բոլոր պատմագիրներն էլ հաշւում են 26 տարի (միայն Ասողիկն ունի 16): Իսկ թէ երբ է նա գահակալել, վկայությունները տարբեր են: Ամենա-

³¹ Տե՛ս Սեբեոսի Պատմություն, ՀՍՍՀ ԳԱ Հրատ., Երեւան, 1979, էջ 100:

³² Տե՛ս, օր., Սեբեոս, էջ 97. Ասողիկ, էջ 86, Սամուել Անեցի, էջ 77: Հ. Մ. Չամչեանցը այս թուերը համաձայնեցնելու համար Մովսեսի կաթողիկոսությունը ստիպուած երկաւրացրել-դարձրել է 43 տարի (551—593), Մ. Չամչեանց, նշ. աշխ. էջ 302 եւն:

հին սկզբնաղբիւրները՝ Անանիա Շիրակունին եւ Սեբէոսը Հայոց եկեղեցու բաժանումը դնում են Մօրիկ կայսեր օրով. եւ յայտնում են նաեւ, որ բաժանման ժամանակ Յունաց մասում նստել է Յովհաննը, Պարսից մասում՝ Մովսէսը³³: Ընդ որում երկուսն էլ նշում են, որ նա հաղորդուել, միաւորուել է քաղկեդոնականների հետ (անդ), իսկ Մովսէսը հաստատուն է մնացել հայրերի դասաւանդին: Այստեղից արդէն պարզ է, որ միեւնոյն ժամանակ երկու հակաթ. կաթողիկոսները չէին կարող իրար հետ հաշտ գոյատեւել **միեւնոյն ժամանակագրութեան մէջ** (թէպէտ բոլոր պատմագիրներն էլ միաձայն վերկայում են, որ Յովհաննի եւ Դուինում նստող կաթողիկոսի միջեւ ռեւէ հակամարտութիւն չի եղել, եւ Յովհաննին էլ որսկում են «երանելի, այր ճշմարիտ, արդար, առաքինի... եւ այլ գեղեցիկ խօսքերով»³⁴, որ վկայում է, թէ իրօք, Հայոց երկու կաթողիկոսներն էլ կարողացել են արտաքուստ պարտադրուած բաժանումը չվերածել ճշմարիտ բաժանման): Այս Յովհանն կաթողիկոսի մասին ժամանակագրական տուեալները եւս հակասական են: Ըստ Դարսիսանակերտցու, նա կաթողիկոս է եղել Աբրահամ Աղբաթանեցու հետ միաժամանակ³⁵: Նոյնն է ասում եւ Ասողիկը³⁶: Իսկ Սամուէլ Երէցը Յովհաննին դնում է կաթողիկոսների ցուցակի մէջ Աբրահամից յետոյ եւ նշում. «Ոմանք ի պատմագրաց զտէր Յոհանն եւ զտէր Աբրահամ ի միում ամի ասեն վախճանեալ, եւ ըմանք այսպէս, որպէս գրեալս են»³⁷: Հայոց կաթողիկոսների բոլոր (ինձ յայտնի) հին գաւազանագիրքերի մէջ Յովհանն Բազարանցին դրուած է Աբրահամ Աղբաթանեցուց յետոյ եւ նրան տրուած է 26 տարի: Իսկ Մ. Օրմանեանի կազմած կանոնում այս կաթողիկոսը տեղ չունի³⁸:

Արդ տեսնենք, թէ այս հատուածի ժամանակագրութիւնը ինչ կերպ կարելի է հասկանալ ժամանակով ամենամօտիկ սկզբնաղբիւրների՝ Անանիա Շիրակունու եւ Սեբէոսի տուեալների միջոցով:

Անանիա Շիրակունին, որ կարող է համարեալ ժամանակակից սեպուել, յայտնում է որ Մօրիկի օրօք Հայոց երկիրն ու կաթողիկոսութիւնը բաժանուել են երկուսի, Յունաց մասում՝ Յովհաննը, Պարսից մասում՝ Մովսէսը: Միեւնոյն ժամանակ յայտնում է, որ Հերակլ կայսեր 19-րդ տարում (որ է 629 թ.) Հերակլի գումարած ժողովին մասնակցել է Եզր կաթողիկոսը³⁹: Ի դէպ, Հերակլի (ինչպէս եւ միւս կայսրերի) ժամանակագրութիւնը Շիրակացու մօտ շատ ճիշդ է. օր., ըստ նրա Խոսրով Բ-ի սպանուելը եղել է Հերակլի 17-րդ տարում, որ 627 թ. է., իսկ արդի տուեալներով Խոսրովի մահը 628-ին է: Մօրիկը գահակալել է 582—602 թթ.: Այսինքն, այս տարիները **ինչ որ կերպ** պիտի զուգադիպեն Մովսէսի տարիներին: Միաժամանակ, Շիրակացու մօտ նշուած է, որ Յուստինիանոս Բ-ի ժամանակ Ներսէս կաթողիկոսը ձեռնադրել է Ասորոց Աբդիշո եպիսկոպոսը⁴⁰:

Յուստինիանոս Բ-ի տարիներն են 565—578 թթ.: Սրա առաջին տարուց մինչեւ Հերակլի 19-րդը 63 տարի է ընդամենը: Իսկ Ներսէս կաթողի-

³³ Սեբէոս, էջ 91, Ան. Շիրակացու մատենագր., էջ 397:

³⁴ Յովհ. Դրասխ., էջ 73:

³⁵ Անդ:

³⁶ Ասողիկ, էջ 86:

³⁷ Սամ. Անեցի, էջ 77:

³⁸ Տե՛ս Մ. Օրմանեան, Ազգապատում:

³⁹ Ան. Շիր. Մատենագր., էջ 397:

⁴⁰ Անդ:

կոսից յետոյ եղել են Յովհաննէս Գաբեղեան (15 տարի), Մովսէս (30 տարի), Արրահամ (23 տարի), Կոմիտաս (8 տարի), Քրիստափոր (2—6 տարի) կաթողիկոսները, որոնց բոլորի տարիները միասին (չհաշուած Յովհաննէս Բագրանցու 26 տարին) լինում է 78—82 տարի: Այստեղ դեռ չեն հաշուած Ներսէսի տարիները (եթէ նա իր վերջին տարում չի ձեռնադրել Արդիշոյին), եւ Յուստինիանոսի տարիները (զի կարող էր դա եղած լինել այդ կալսեր ոչ թէ առաջին, այլ մի ուրիշ տարում): Այնպէս որ այստեղ ունենք առնուազն 15—19 տարուայ անհամաձայնութիւն (մի կողմից՝ առաւելագոյնը՝ 63, միւս կողմից՝ առնուազն՝ 78—82 տարի): Պարզ է, որ Ծիրակունու այս տեղեկութիւնների մի մասը աղասաղուած են, կամ յետսամուտ: Իսկ ո՞րը: Եզր Փառամնակերտցու մասին տեղեկութիւնը ժամանակի առումով իր տեղում է: Սա համաձայն է եւ Սերէոսի տոմարներին: Ըստ Սերէոսի պատմութեան, Եզրի հաղորդուելը Հերակլի հետ եղել է տէրումական խաչափայտի գերադարձի ժամանակ (կամ դրանից անմիջապէս յետոյ), որ եղել է Պարսից Արտաշիր արքայի սպանումից անմիջապէս յետոյ⁴¹: Արտաշիրի մահը 629 թուին է եղել, որով Եզրի՝ Հերակլի հետ հաղորդուելն էլ նոյն ժամանակին պիտի վերաբերի (ըստ Սերէոսի): Այս տարեթիւը համընկնում է Անանիա Ծիրակունու տուած՝ Հերակլի 19-րդ տարունա (629 թ.): Այսինքն, Ծիրակունու՝ Եզրին վերաբերող տեղեկութիւնը իր տեղում է եւ հարազատ: Ուրեմն, իր տեղում չէ Ներսէս կաթողիկոսի մասին գրուածը: Հաւանական է, որ այս մի նախադասութիւնը յետսամուտ է եւ շարադրանքի մէջ է մտնուել (գուցէ լուսանցքի լսելումից) մի այլ ժամանակագրական կոնցնի հիման վրայ: Առանց Ներսէս Բագրեւանդեցու մասին այս լսելումի Ծիրակացու տոմարները կը դառնան ինքնահամաձայնեցուած: Ուրեմն, ըստ Ան. Ծիրակունու, 629-ին Հայոց կաթողիկոս է եղել Եզր Փառամնակերտցին, իսկ Մօրիկի օրօք եղել է եկեղեցու բաժանումը Մովսէս եւ Յովհաննէս կաթողիկոսներով:

Արդ գանք Սերէոսի պատմութեան տոմարներին: Այստեղ, թէպէտ ուղղակի տոմարներ չկան տոմարի նորոգման եւ դա անող կաթողիկոսի մասին, այդուհանդերձ կան ոչ սակաւ կողմնակի տոմարներ, որոնցով կարելի է պարզել կաթողիկոսների ժամանակագրութիւնը:

Սերէոսը եւս, ինչպէս Անանիա Ծիրակունին, Մօրիկի օրօք է դնում կաթողիկոսութեան բաժանումը. մի կողմում Մովսէս, միւսում՝ Յովհաննէս կաթողիկոսներով⁴²: Սա կը լինի 582—602 միջոցին: Խոսքով Ա-ի 41-րդ տարում դրնում է Սուրէն մարզպանի սպանումը Վարդան Մամիկոնեանի կողմից⁴³, որ կ'անի 571 թ.: Այս տարեթիւը լաւ համընկնում է այլ պատմագիրների տուած ժամանակին⁴⁴: Սերէոսը տալիս է նաեւ Արրահամ կաթողիկոսի ընտրութեան ժամանակը՝ Խոսքով Բ-ի **18-րդ տարում**, Սմբատ Բագրատունու կողմից⁴⁵: Այս տոմարը լաւ համաձայնում է Ուխտամէսի յայտնածին, որ սակայն դրնում է Խոսքովի 17-րդ տարում⁴⁶, Մարերի ամսում, Չատկուայ յաջորդ կի-

⁴¹ Սերէոս, էջ 130, 131:

⁴² Անդ, էջ 91:

⁴³ Անդ, էջ 67:

⁴⁴ Տէ'ս, օր., Ասողիկ, էջ 84—85: Տալիս է բացի Խոսքովի 41-րդը նաեւ Յուստինոս Բ-ի 7-րդ տարին, որ էլի 571 թ. է: Տալիս է եւ ամսաթիւը՝ արեգի 22-երեքշաբթի: Սա թերեւս ուղղելի է «լսմանամ արեգի ի. ք. ամսոյն...», որ կ'անի արեգի 2 եւ իրօք, 571 թ. արեգի 2 = փետրուարի 3, եւ օրն էլ երեքշաբթի է:

⁴⁵ Սերէոս, էջ 100:

⁴⁶ Ուխտամէս, էջ 3:

րակին⁴⁷, որ փաստօրէն տալիս է մի տարով պակաս՝ 606 թ.: Ի դէպ, Ռիստանէս եպիսկոպոսի հէնց այս տոնալն է հիմք դարձել Մ. Օրմանեանի կազմած ժամանակագրութեան՝ Բարգէն Ռթմեցի-Կոմիտաս Աղճեցի հատուածի համար⁴⁸: Օրմանեանը Ռիստանէսի տուած 17-րդ տարին նույնացնում է 607 թ. Ջատիկի ժամանակուայ հետ եւ այդ ժամանակ էլ դնում Արրահամի ընտրութիւնը եւ շեռնադրութիւնը: Եւ ապա այդ թուականից դէպի ետ՝ յայտնի գաւառաբնակներով կարգում միւս կաթողիկոսներին: Անշուշտ, Արրահամ Աղրաթանեցու ընտրութեան ժամանակը շատ յստակ է յայտնուած (Սեբէոս, Ռիստանէս) եւ վեճի առարկայ չէ: Բայց շատ կասկածելի եւ վիճալարոյց է այդ տարեթուով նախորդների ժամանակի ճշդումը:

Սեբէոսի՝ մեզ հետաքրքրող յաջորդ տեղեկութիւնը Արրահամի վախճանունելու մասին է: Սեբէոսը յայտնում է, որ Արրահամը վախճանուել է Յովհանն Բագարանցի կաթողիկոսի հետ **նոյն տարում**, իսկ Յովհաննի մասին էլ յայտնում է, որ Խոսրով Բ-ի **21-րդ տարում** Յովհաննը գերի է ընկել պարսիկների ձեռքը, տարուել Ամմատան, ուր եւ վախճանուել է⁴⁹: Սա շատ ուշագրաւ տեղեկութիւն է, որ պատշաճ կարեւորութիւն չի ստացել հարցիս նախորդ քննութիւնների ժամանակ: Այսինքն, ըստ Սեբէոսի, Արրահամը եւս վախճանուել է Խոսրովի 21-րդ տարում: Ուրեմն ստացում է, որ ըստ Սեբէոսի, Արրահամը կաթողիկոս է եղել միայն 3 տարի, այնինչ, Արրահամի կաթողիկոսութիւնը միւս պատմագիրները դնում են 23 տարի⁵⁰: Խոսրովի 21-րդ տարին 610 թիւն է: Եթէ հաշուենք նոյնիսկ Յովհաննի (ուրեմն եւ Արրահամի) մահը գելունլուց մի տարի անց, կ'ունենանք 611 թ.:

Ի՞նչ կերպ համաձայնեցնել այս 3 եւ 23 տարիները: Սեբէոսի մօտ վրիպակի, կամ աղաւաղման մասին խօսք լինել չի կարող, զի այս 3-ը ոչ թէ իր գրածն է, որ խեղուէր, աղաւաղուէր, այլ սա ստացուել է իր ժամանակագրական համակարգի քննութեամբ: Ընդհանրապէս, Սեբէոսի ժամանակագրական համակարգը շատ լաւ ներդշնակում արդի համակողմնի քննութիւններով ստացուած տարեթուերին (Յունաց կայսրեր, Պաբսից արքաներ եւն): Այնպէս որ, հիմք չունենք Սեբէոսի ժամանակագրութեանը հէնց միայն այս կէտում կասկածելու: Ըստ իս, թիրիմացութիւնը ծագել է նրանից, որ Արրահամ Աղրաթանեցին **իրօք կաթողիկոսել է միայն 3 տարի**, բայց իրեն է վերագրուել նաեւ իրենից առաջուայ քսանամեայ ժամանակամիջոցը եւս, որով իր կաթողիկոսութիւնը հաշուել է 23 տարի:

Ինչպէ՞ս է դա տեղի ունեցել: Ըստ Սեբէոսի, Արրահամի տարիները լինում են 607—610 թթ. (գուցէ՝ 611): Եթէ նոյն՝ 610 թիւը համարենք նաեւ Յովհանն Բագարանցու մահուան տարի (ըստ Սեբէոսի եւ շատ այլոց), Յով-

⁴⁷ Անդ, էջ 54, 57, 61: Ջատիկուայ յաջորդ կիրակին Մարերի ամսում է ընկալ 606 եւ 608 թուերին (բայց ոչ 607-ին) Աւելացուած է եւ «չկա ամսոյն Նաւասարդի» (էջ 61), որ ակնյայտ սխալ է: Ջատիկուայ յաջորդ կիրակին Նաւասարդի 30-ին է եղել առաջին անգամ 960 թ. (երեւի հէնց այդ ժամանակ էլ այդ յանելումն արուել է): Խոսրովի 17-րդ տարին 606 թիւն է, այնպէս որ, ըստ Ռիստանէսի, Արրահամի, ընտրութիւնը եղել է 606 թ. ապրիլի 10=Մարերի 17-ին:

⁴⁸ Տե՛ս Մ. Օրմանեան, Ազգապատում, սիւն 481—490, 610 եւն:

⁴⁹ Սեբէոս, էջ 111—112:

⁵⁰ Տե՛ս օր. Ասողիկ, էջ 86, նաեւ՝ էջ 403, Սամուէլ Անեցի, էջ 76, նաեւ՝ էջ 268, 271, 275: Այստեղ քերուած են փաստօրէն Հայոց կաթողիկոսների հինգ տարբեր կանոններ, որոնք բոլորն էլ տալիս են Արրահամի համար 23 տարի (Յովհ. կաթողիկոս, Ասողիկ, Սամ, Անեցի եւ այլոք):

հան Բագարանցու համար կ'ունենանք կաթողիկոսութեան 26 տարիները 584—610 թթ.: Ուրեմն, Յովհան Բագարանցու կաթողիկոսութիւնը պէտք է հաշուել 584-ից: Սա, իրօք, Մօրիկ կայսեր օրօք է եւ չի հակասում Անանիա Շիրակունու (եւ այլոց) տուեալին այդ մասին: Սա արտաքուստ հակասում է Շիրակունու եւ Սեբեոսի (եւ այլոց) այն հաղորդմանը, թէ Մօրիկի օրօք կաթողիկոսութիւնը բաժանուեց եւ մի կողմում նստաւ Մովսէսը, միւսում՝ Յովհանը: Բայց այս «հակասութիւնը» յաղթահարելի է:

Գիտենք, որ Մովսէսից յետոյ երեք տարի կաթողիկոսական տեղապահ է եղել Վրթանէս Քերթողը, մինչեւ յաջորդ կաթողիկոսի ընտրութիւնը: Ահա Վրթանէսի տեղապահութեան այս երեք տարիներն էլ կարող էին դիտուել իբր Մովսէսի կաթողիկոսութեան շարունակութիւն, ըստ այդմ, այս շրջանի Հայոց կաթողիկոսների համար կ'ունենանք ահա այսպիսի տարիներ.

Մովսէս Եղիվարդեցի 551—581 (30 տարի),
 Վրթանէս Քերթող (տեղապահ) 581—584 (3 տարի),
 Յովհան Բագարանցի 584—610 (26 տարի),
 Աբրահամ Աղբաթանեցի 607—610 (3 տարի),
 Կոմիտաս Աղձեցի 610—618 (8 տարի):

Սա լաւ յարմարում է նաեւ օրացույցի կարգադրման խնդրին: Ըստ այս ցուցակի տոմարի կարգադրումը դրուած է Մովսէսի 10-րդ տարում, որ 560 թին է եւ, ինչպէս վերը տեսանք, Ծ-եակի գիտի, Աղէքսանդրիայի ժողովի տարեթիւն է: Յովհան Բագարանցու կաթողիկոսութիւնն էլ սկսում է 584-ից, եւ քանի որ Մովսէսի աթոռին՝ Դուինում այլ կաթողիկոս չկար (Վրթանէսը միայն տեղապահ էր), դա դեռ կարող էր դիտուել, իբր Մովսէսի օրօք: Ի դէպ, այս կերպ բացատրում է եւ այն տարօրինակ իրողութիւնը, որ թէպէտ Մովսէսից յետոյ տեղապահ է եղել Վրթանէս Քերթողը, բայց Սմբատը գալով Հայաստան, կաթողիկոս է ընտրում Աբրահամին: Ըստ իմ առաջարկած ցուցակի, Վրթանէսից յետոյ կաթողիկոս է եղել (հնարաւոր է նոյնիսկ՝ նրա տեղապահութեան շրջանի վերջերում, նրա օրօք) Յովհան Բագարանցին, որին նշանակել էր Յունաց կայսր Մօրիկը: Իսկ Սմբատը եկել է Հայաստան 607-ին, երբ կար Յովհան Բագարանցի կաթողիկոսը, իսկ Վրթանէս Քերթողն էլ երեւի այլ գործի էր (ամեն դէպքում՝ տեղապահ չէր):

Այս ցուցակը (կաթողիկոսների եւ նրանց տարիների) շատ լաւ ներդաշնակում է նաեւ ժամանակի քաղաքական անցուդարձի մասին մեր իմացածին: Մովսէսի մահից յետոյ, Վրթանէսի տեղապահութեան տարիներին Պարսից գահին էր Ուրմիզդ Դ-ը (579—590), որի ժամանակ պարսիկներն զբաղուած էին ներքին կռիւներով (մինչեւ որ զօրքն ապստամբեց Ուրմիզդի դէմ եւ արքայ հռչակեց Վահրամ Միհրեանդակին)⁵¹: Եւ, քանի որ Յոյներն էլ Հայոց հետ արդէն երկար ժամանակ ունէին դաւանաբանական խընդիրներ, ու Հայոց կաթողիկոսի աթոռն էլ թափուր էր, Յունաց համար շատ նպաստաւոր ժամանակ էր Հայոց եկեղեցին իրենց ձեռքը վերցնելու: Այնպէս որ, շատ հաւանական է, հէնց այս ժամանակ, Մօրիկը, օգտուելով առիթից, Վրթանէսի տեղապահութեան օրօք, կաթողիկոս է դնում Յովհանին: Դրանով եւ խափանում է նոր կաթողիկոս ընտրելու գործը: Աւարտում է եւ Վրթանէսի տեղապահութիւնը: Ուրմիզդ Դ-ի տարիներին, Մովսէս Եղիվարդեցու վերջին տարիներից էլ սկսում է Վրաց բաժանման գործընթացը: Հե-

⁵¹ Տե՛ս օր. Սեբեոս, էջ 73—76:

տագայում, Մօրիկ կայսեր օգնությամբ գահ է բարձրանում Ռոմիզդի որդի Խոսրով Բ-ը, որ այդ օգնության դիմաց մեծ տարածքային զիջումներ է անում Մօրիկին: Այս շրջանում (մինչև Մօրիկի մահը՝ 602 թ.) խօսք լինել չի կարող Պարսից կողմից Հայոց եկեղեցու հարցերին միջամտելու մասին: Պարսից եւ Յունաց հակամարտությունը վերսկսում է Մօրիկի սպանությունից յետոյ՝ 602 թուից: Հիմա արդեն Խոսրովը ինքն է միջամտում Հայ եկեղեցու գործերին. 607-ին Հայաստան է ուղարկում նախկինում Վրկանայ մարզպան Սմբատ Բագրատունուն՝ Հայոց կաթողիկոս կարգելու առաջադրանքով: Սմբատն էլ, լինելով ժամանակի ամենահեղինակաւոր Հայ ազնուականը, կաթողիկոս է կարգում Աբրահամ Աղբաթանեցուն, որ Ռշտունեաց եպիսկոպոսն էր: Դրանից երեք տարի անց Յովհան Բագարանցու գերեվարությամբ, փաստօրէն ասարտում է Յունաց մասի առանձին կաթողիկոսությունը եւ Յովհանի ու Աբրահամի (նույն տարում) վախճանուելուց յետոյ՝ դարձեալ միակ կաթողիկոս է դառնում Կոնստան Աղձեցին (փաստօրէն 610-ից): Դրանից յետոյ 629 թուին մի փորձ էլ Հերակլ կայսրն է անում (իր 19-րդ տարում) Հայ եկեղեցին կիսելու կամ յունադասան դարձնելու, որ սակայն մնում է անարձագանգ: Այս ժամանակուայ կաթողիկոս Եզր Փառածնակերտցին կարողանում է ընդհանուր յայտարարի գալ Հերակլի հետ՝ առանց սկզբունքային զիջումների, թէպէտ գերծ չի մնում հայ հակաքաղկեդոնականների պարսաւանքից:

Փաստօրէն, մինչև Մօրիկի մահը 602 թ. Յովհան Բագարանցին ընկալուել է իբր ամենայն Հայոց կաթողիկոս (կամ գուցէ՝ մինչև 607-ը՝ Աբրահամի ընտրությունը): Ի դէպ, իրերի այդպիսի վիճակով շատ լաւ բացատրում է նաեւ այն իրողությունը, որ Սմբատը իր յոյժ բարձր հեղինակությամբ ու մեծ իշխանությամբ հանդերձ լուրջ դժուարութեան է հանդիպում կաթողիկոսի ընտրութեան համար հայ եպիսկոպոսներին ժողովի հաւաքելու գործում: Առաջին անգամ հաւաքը փաստօրէն չի կայանում շատերի բացակայութեան պատճառով, եւ երկրորդ անգամ են ժողով հրաւիրում ու լուծում կաթողիկոսի ընտրութեան խնդիրը⁵²: Բնական է, մի կաթողիկոսի առկայությամբ դժուար պիտի լինէր բոլոր եպիսկոպոսներին ժողովել՝ այլ կաթողիկոս ընտրելու համար, առաւել եւս, որ, դառնելով բոլոր պատմագիրների շրջալս դրուատանքից, Յովհանը եղել է շատ յարգուած, պատուուած եւ անբասիր, սրբակեաց անձի համբաւ ունեցող մէկը:

Այսպիսով, տեսնում ենք, որ քննարկուող ժամանակաշրջանի համար աստ առաջարկուած ժամանակագրությունը (Հայոց կաթողիկոսների) լաւ յարմարում է Անանիա Շիրակունու եւ Սեբէոսի տուեալներին, ներդաշնակ է այդ շրջանի պատմական անցուդարձի մասին մեր իմացածին: Սրա հետ ներդաշնակ են նաեւ Սեբէոսից յետոյ եղած պատմագիրների (Յովհ. կաթողիկոսի, Ասողիկի, Ռիստանէսի, Սամ. Անեցու եւ շատ այլոց) տուեալների մի պատկառելի մասը: Անշուշտ, այս պատմագիրների որոշ տուեալներ հակասում են առաջարկուած ժամանակագրութեանը: Բայց դա էլ պէտք է բընական դիտել, զի, այս հեղինակների տուած ժամանակագրութիւնները իրենք գերծ չեն ներքին անհամաձայնութիւններից, հակասութիւններից, որի մասին վերը խօսուեց (դրա մի օրինակը տեսանք Յովհ. Դրասխանակերտցու պատմութեան վրայ): Այնպէս որ, աւելորդ է այդ հակասութիւնների (առաջարկուած ժամանակագրութեան եւ ուշ շրջանի հեղինակների տուեալների

⁵² Այս մասին մանրամասն տե՛ս Ռիստանէս պէիսկոպոսի պատմութեան մէջ:

րի) առանձին քննարկումը: Փորձենք բացատրել միայն, թե ինչ կերպ կարող էր ծնունդ աչա ժամանակագրական խառնաշփոթը:

Ինչպես տեսանք, Յովհան Բագարանցին կաթողիկոս է ընտրուել ոչ թե Հայ եկեղեցու բնականոն ճանապարհով, այլ **նշանակուել է Մօրիկի կողմից:** Անշուշտ, սա չէր կարող դիրութեամբ մարսուել եկեղեցու կողմից: Բացի այդ, Յովհանին դրուատելով հանդերձ, պատմագիրները չեն զլանում նշել, որ նա ընդունել է քաղկեդոնական դասանանքը (անշուշտ, ստիպողաբար): Սա եւս ծանր փաստ է ընդդէմ այս կաթողիկոսի: Արդէն այս երկու հանգամանքը բաւարար պիտի լինէին այս կաթողիկոսի հետ կապուած թիրիմացութիւններ ծնելու համար: Յայտնի է, օրինակ, որ Եզր Փառածնակերտցու՝ Հերակլ կայսեր հետ հաղորդուելը պատճառ եղաւ, որ կաթողիկոսների ցուցակներում նրա անունը գրուի գլխիվայր գլխագրով⁵³: Իսկ Յովհանի պարագայում վիճակն անշուշտ, ատելի «ծանր» էր: Դեռ նրա կաթողիկոսութեան օրօք իսկ ընտրուել է այլ կաթողիկոս՝ Աբրահամը, եւ Յովհանը, փաստօրէն, եղել է հակաթոռ, որ եւ նշում են շատ հեղինակներ: Այնպէս որ բոլոր հիմքերը կային Յովհանին կաթողիկոսների ընդհանուր ցուցակից դուրս ձգելու, նրա տարիները ուրիշին վերագրելու: Միեւնոյն ժամանակ նրա բարի համբաւը պիտի հիմք տար նրան այդ ցուցակում պահելու: Ահա եւ ստացում է, որ ոմանք նրա տարիները տալիս են ուրիշի (Աբրահամին), ոմանք նրանք դնում են Աբրահամի հետ միաժամանակ (հակաթոռ) կաթողիկոս⁵⁴, ոմանք, նրան իր 26 տարիներով դնում են Աբրահամից յետոյ⁵⁵, իսկ ի վերջոյ նոր շրջանում էլ նա լրիւ արտաքսում է Հայոց կաթողիկոսների ցուցակից⁵⁶: Իսկ 26 տարի գահակալած կաթողիկոսի լինել-չլինելը ցուցակում, բնական է, լուրջ փոփոխութիւններ պիտի մտցնէր Հայոց կաթողիկոսների ժամանակագրութեան մէջ: Սա էլ իր հերթին, կը բերէր նրան, որ մէկի գործերը կը վերագրուէին մի ուրիշի: Մասնաւորապէս հէնց այս կերպ օրացոյցի կարգադրումը կարող էր վերագրուել Ներսէս Բագրեւանդեցուն կամ Յովհաննէս Գաբեղեանին: Կամ Խաղսմախի ճակատամարտին իր զօրաւոր աղօթքով մասնակցած կաթողիկոսը կը դառնար Ներսէսը (այնինչ այդ ճակատամարտը եղել է Վարդանի՝ 571 կամ 572 թ. ապստամբութիւնից յետոյ՝ Մովսէս Եղիվարդեցու օրօք: Պատահական չէ, որ Մովսէս կաթողիկոսը պատմագիրների կողմից որակուած է «այր աստուծոյ, սուրբ» կոչումներով:

Այսպիսով, ճշդելով Զ—Է դարերի Հայոց կաթողիկոսների ժամանակագրութիւնը, ստանում ենք այսպիսի պատկեր:

551 թ. կթողիկոս է դարձել Մովսէս Եղիվարդեցին: Նա էլ, իր կաթողիկոսութեան սկզբում ժողով է գումարել օրացոյցի հարցը լուծելու (գուցէ եւս՝ այլ հարցերի) համար:

Նրա առաջին տարում որոշուել է առանձին տոմար հիմնել, որը եւ արել է Աթանաս Տարօնացին:

Մովսէսի 10-րդ տարում՝ 560-ին Աղէքսանդրիայում կարգադրուել է միասնական տոմարի խնդիրը, ընդունուել է ԵԼԲ-պարբերաշրջանը, նոյնիսկ Հայերի համար անշարժ տոմար են կարգել, սակայն Հայոց եկեղեցին չի ընդունել դա, շարունակել է իր սկսած տարեհաշիւը, պահպանել է իր նահան-

⁵³ Մ. Օրմանեան, Հայոց եկեղեցին. Կ. Պօլիս, 1911, էջ 65:

⁵⁴ Յովհ. Դրասխասանկերտցի, էջ 72—73:

⁵⁵ Սամուէլ, Անեցի, էջ 77:

⁵⁶ Մ. Օրմանեան, Ազգապատում, եւ այլուր:

Պարսից մասում: Սմբատը, թեպետ որոշ դժուարությամբ, այդուհանդերձ յաջողում է աչդ գործը. կազմակերպում է կանոնաւոր կաթողիկոսական ընտրութիւն, Ռշտունեաց եպիսկոպոս (Ռշտունիքը Պարսից մասում էր) Աբրահամ Աղբաթանեցուն ընտրում են կաթողիկոս Հայոց, ապա կառուցում է Դուինի սբ. Գրիգոր եկեղեցին (Հայերին սիրաշահելու համար Խոսրովը նույնիսկ կարգադրում է քանդել եւ այլուր կառուցել սոյն եկեղեցու հարեանութեամբ եղած բերդը): Ապա Սմբատը վերադառնում է Պարսկաստան՝ իր ծառայութեամբ:

610-ին Պարսիկները գրաւում են Կարինը եւ ժողովրդի հետ միասին գերեւարում անդ ապաստանած ծերունի Յովհան կաթողիկոսին, տանում են Ահմատան, ուր եւ նա վախճանում է: Նոյն տարին վախճանում է եւ Աբրահամ Աղբաթանեցին, աթոռին մնալով 3 տարի:

610-ին կաթողիկոս է ընտրում Կոմիտաս Աղձեցին, որով վերացում է Աւանի կաթողիկոսական աթոռը: Հետաքրքիր է, որ հէնց Կոմիտասն էլ կառուցում է սբ. Հռիփսիմէի սքանչելի վկայարանը, որ իր յօրինուածքով համարեա կրկնում է Աւանի տաճարին, եւ կառուցուած լինելով Վաղարշապատում, Հայոց մայրաքաղաք Դուինին մօտ, շատ սիրուած սուրբի գերեզմանի վրայ, իր շուքով ու փառքով խամբեցնում, մոռացնել է տալիս Աւանի եկեղեցու փառքը, որով եւ՝ Յովհանի աթոռի յիշատակը: Ըստ այսմ հարկ է նաեւ վերանայել սբ. Հռիփսիմէի վկայարանի շինութեան տարեթիւր: Ընդունուած 618 թիւը Կոմիտասի վերջին տարին է փաստօրէն եւ քիչ հաւանական: Մինչդեռ Սեբեոսը տալիս է Խոսրովի 28-րդ տարին⁵⁸, որ կանի 617 թիւը եւ անելի յարմար է տաճարի շինութիւնը դնել Կոմիտասի նախավերջին, եւ ոչ թե վերջին տարում (կարող էր պարզապէս չհասցնել շինութիւնը եւ կիսատ թողնել):

Անշուշտ, ժամանակագրական շատ այլ ճշդումներ էլ իր ետեւից կը բերի կաթողիկոսների տարիների այս շտկումը, որ սակայն դուրս է յօդուածիս նիւթից. դրանց ըստ հնարաւորութեան կ'անդրադառնամ այլ անգամ:

ԳՐԻԳՈՐ ԲՐՈՒՏԵԱՆ,

⁵⁸ Սեբեոս, էջ 121:

